



10
10
10

新刊古今圖書集成

特

門 5
號 3537
卷 44

重修揚州府志卷之六十六

事略志二

唐

高祖武德二年四月隋禦衛將軍陳稜以江都來降以

稜為揚州總管

通鑑唐紀三

九月賊帥李子通據江都僭稱天子國號吳

舊唐書高祖紀

沈法興克毘陵謂江淮之南指揮可定自稱梁王都

毘陵置百官性殘忍專尚威刑其下離怨時杜伏威

據歷陽陳稜據江都李子通據海陵俱有窺江表之

心法興軍數敗曾子通圍稜於江都稜送質求救於



法興及伏威法興使其子綸將兵數萬與伏威共救
之伏威軍清流綸軍楊子相去數十里子通納言毛
文深獻策募江南人詐為綸兵夜襲伏威營伏威復
遣兵襲綸由是二人相疑莫敢先進子通得盡銳攻
江都克之稜奔伏威子通入江都因縱擊綸大破之
伏威亦引去子通即皇帝位國號吳改元明政丹陽
賊帥樂伯通帥眾萬餘降之子通以為左僕射通鑑唐紀

三案隋書煬帝紀子通自稱楚王時已建元明政

二年六月詔隋帝及其宗室柩在江都者為營窆置陵廟以故宮人守之新唐書高祖紀

李子通棄江都保於京口舊唐書子通本傳

子通度江攻沈法興取京口法興奔吳郡於是丹陽
毘陵等郡皆降於子通杜伏威遣行臺左僕射輔公
祐將卒數千攻子通以將軍闕稜王雄誕為之副子
通敗走公祐逐之反為所敗還閉壁不出王雄誕曰
子通無壁壘又初勝乘其無備擊之可破也公
祐不從雄誕以其私屬數百人夜出擊之因風縱火
子通大敗降其卒數千人子通食盡棄江都保京口
江西之地盡入於伏威通鑑唐紀四

五年八月葬隋煬帝於揚州舊唐書高祖紀胡三省曰三年六月有詔葬隋帝

此又云葬煬帝蓋三年李子通猶據江都雖有是詔不果葬也

六年八月淮南道行臺左僕射輔公祏反遣趙郡王孝恭嶺南道大使李靖討之上同

伏威與公祏少相愛狎公祏年長伏威兄事之軍中

咸呼為伯畏敬與伏威等伏威忌之陰奪其兵權公

祏怏怏不平乃與故人左遊仙偽學道辟穀以遠其

事伏威入朝遊仙乃說公祏令反舊唐書公祏本傳

七年三月丙戌趙郡王孝恭破公祏於蕪湖拔梁山等

三鎮辛卯安撫使任瓌拔楊子城廣陵城主龍龕降已

亥以孝恭為東南道行臺右僕射李靖為兵部尚書頃

之廢行臺以孝恭為揚州大都督靖為府長史通鑑唐紀六

案舊書孝恭傳云總管李靖下廣陵城拔楊子鎮與通鑑所載當是一事蓋任瓌等皆受靖節度故又屬之靖也

八年十二月以襄邑王神符檢校揚州大都督始自丹

陽移州府及居民於江北通鑑唐紀七先時李子通反揚州僞置丹陽江寧縣至

是復治江都舊書神符傳載此事在九年

太宗貞觀二十二年三月庚子隋蕭后卒詔復其位號

諡曰愍使三品護葬備鹵簿儀衛送至江都與煬帝合

葬通鑑唐紀十四

煬帝皇后蕭氏字文化及之亂隨軍至聊城化及敗

沒於竇建德是時突厥處羅可汗方盛其可賀敦即

隋義城公主也遣使迎后遂入於虜廷貞觀四年歸

京師賜宅興道里二十二年殂詔以皇后禮於揚州

合葬於煬帝陵謚曰愍北史后妃傳下

高宗上元中封霍王元軌子緒為江都郡王舊唐書高祖子傳

案高宗於咸亨五年八月改元上元至三年又改儀鳳傳云上元中封宜在二年今姑闕又據高宗紀總章二年封諸王嫡子皆為郡王緒似當於是年封疑傳或有誤

中宗嗣聖元年九月柳州司馬徐敬業偽稱揚州司馬

殺長史陳敬之據揚州起兵自稱上將以匡復為辭舊唐書則天紀案是年武后廢帝

為虛陵王改元文明又改光宅

時諸武用事唐宗室人人自危厥心憤惋會睂州刺

史英公李敬業及弟蓋屋令敬猷給事中唐之奇長

安主簿駱賓王詹事司直杜求仁皆坐事敬業貶柳

州司馬敬猷免官之奇貶栢蒼令賓王貶臨海丞求

仁貶繫令蓋屋尉魏思溫嘗為御史復被黜皆會於

揚州各自以失職怨望乃謀作亂以匡復廬陵王為

辭思溫為之謀主使其黨監察御史薛仲璋求奉使

江都令雍州人韋超詣仲璋告變云揚州長史陳敬

之謀反仲璋收敬之繫獄居數日敬業乘傳而至矯

稱揚州司馬來之官云奉密旨以高州酋長馮子猷

謀反發兵討之於是開府庫令士曹參軍李宗臣就
錢坊驅囚徒工匠授以甲斬敬之於繫所錄事參軍
孫處行拒之亦斬以徇僚吏無敢動者遂起一州之
兵復稱嗣聖元年開三府一曰匡復府二曰英公府
三曰揚州大都督府敬業自稱匡復府上將領揚州
大都督以之奇求仁爲左右長史宗臣仲璋爲左右
司馬思溫爲軍師賓王爲記室旬日閒得勝兵十餘
萬移檄州縣敬業求得人貌類故太子賢者給帑云
賢不死亡在此城中令吾屬舉兵因奉以號令楚州
司馬李崇福帥所部三縣應敬業甲申以左玉鈐衛
大將軍李孝逸爲揚州道大總管將兵三十萬以將
軍李知十馬敬臣爲之副討敬業魏思溫說敬業直
指洛陽薛仲璋曰金陵有王氣且大江天險足以爲
固不如先取常潤爲定霸之基思溫曰山東豪傑以
武氏專制憤惋不平聞公舉事皆蒸麥飯爲糧伸鋤
爲兵以俟南軍之至不乘此勢以立大功乃更蓄縮
自謀巢穴遠近聞之其誰不解體敬業不從使唐之
奇守江都將兵度江攻潤州丁酉追削李敬業祖考
官爵發冢斲棺復姓徐氏敬業聞孝逸將至自潤州
回軍拒之屯高郵之下阿溪使敬猷逼淮陰別將韋

超尉遲昭屯都梁山孝逸軍至臨淮偏將雷仁智與
敬業戰不利孝逸懼按兵不進監軍殿中侍御史魏
元忠謂孝逸曰天下安危在茲一舉今大軍久留不
進萬一朝廷更命他將以代將軍將軍何以逃逗撓
之罪乎孝逸乃引軍而前壬寅馬敬臣擊斬尉遲昭
於都梁山十一月辛亥以左鷹揚大將軍黑齒常之
爲江南道大總管討敬業韋超擁眾據都梁山諸將
皆曰超憑險自固攻之多殺士卒不如分兵守之大
軍直趨江都覆其巢穴度支使薛克構曰超雖據險
其眾非多今多留兵則前軍勢分少留兵則終爲後
患不如先擊之其勢必舉舉都梁則淮陰高郵望風
瓦解矣魏元忠請先擊徐敬猷諸將曰不如先攻敬
業敬業敗則敬猷不戰自擒矣元忠曰不然賊之精
兵盡在下阿烏合而來利在一決萬一失利大事去
矣敬猷出於博徒不習軍旅其眾單弱人情易搖大
軍臨之駐馬可克敬業雖欲救之計程必不能及我
克敬猷乘勝而進雖有韓白不能當其鋒矣孝逸從
之引兵擊超超夜遁進擊敬猷敬猷脫身走庚申敬
業勒兵阻溪拒守後軍總管蘇孝祥夜將五千人以
小舟度溪先擊之兵敗孝祥死士卒赴溪溺死者過

半左豹韜衛果毅漁陽成三朗為敬業所擒唐之奇
給其欲曰此李孝逸也將斬之三朗大呼曰我果毅
成三朗非李將軍也官軍今大至矣遂斬之孝逸等
諸軍繼至戰數不利孝逸懼欲引退魏元忠與行軍
管記劉知柔言於孝逸曰風順荻乾此火攻之利固
請決戰敬業置陳既久士卒多疲倦顧望陳不能整
孝逸進擊之因風縱火敬業大敗斬首七千級死者
不可勝紀敬業等輕騎走入江都挈妻子奔潤州將
入海奔高麗孝逸進屯江都分遣諸將追之乙丑敬
業至海陵界阻風其將王邗相斬敬業敬猷及駱賓

王首來降餘黨唐之奇魏思温皆捕得傳首神都揚

潤楚三州平通鑑唐紀十九 案 薛仲璋舊書作薛璋 劉延嗣為潤州

司馬敬業攻潤州執延嗣令降辭曰今日之事得死

為幸敬業將斬之魏思温救之獲免乃囚之於江都

獄舊唐書劉德威傳

武后垂拱四年十二月乙酉殺江都郡王緒新唐書則天紀

中宗神龍元年江都王緒孫暉嗣王新唐書高祖諸子傳 據舊書中宗

紀編入 此年

元宗開元二十六年潤州刺史齊澣開伊婁河於揚州

南瓜洲浦舊唐書元宗紀下

天寶中封儀王璿子鍾爲廣陵郡王

舊唐書元宗諸子傳案傳云天寶

中封年
月無考

肅宗至德元載十二月江陵大都督府永王璿擅領舟

師下廣陵

舊唐書肅宗紀

上皇入蜀命諸子分總天下節制璿領四道節度都

使鎮江陵時江淮租賦山積於江陵璿召募勇士數

萬人子襄城王瑒有勇力好兵薛鏐等爲之謀主以

爲今天下大亂惟南方完富璿握四道兵封疆數千

里宜據金陵保有江表如東晉故事上聞之敕璿歸

覲於蜀璿不從上召高適與謀適言璿必敗狀十二

月置淮南節度使領廣陵等十二郡以適爲之置淮

南西道節度使領汝南等五郡以來瑒爲之使與江

東節度使韋陟共圖璿甲辰璿擅引舟師東巡沿江

而下吳郡太守李希言平牒璿詰其擅引兵東下之

意璿怒分兵遣其將渾惟明襲希言於吳郡季廣琛

襲廣陵長史淮南採訪使李成式於廣陵璿進至當

塗希言遣其將元景曜及丹徒太守閻敬之拒之成

式亦遣其將李承慶拒之璿擊斬敬之景曜承慶皆

降璿江淮大震高適與來瑒韋陟會於安陸結盟誓

楸以討之

通鑑唐紀三十五

載二月戊戌永王璘敗死其黨薛鏐等皆伏誅同上
時李成式與河北招討判官李銑合兵討璘銑兵數
千軍於楊子成式使判官裴茂將兵三千軍於瓜步
廣張旗幟列於江津璘與其子瑒登城望之始有懼
色季廣琛召諸將謂曰吾屬從王至此天命未集人
謀已墮不如及兵鋒未交早圖去就不然死於鋒鏑
永爲逆臣矣諸將皆然之廣琛以麾下奔廣陵渾惟
明奔江寧馮季康奔白沙璘憂懼不知所出其夕江
北之軍多列炬光照水中一皆爲兩璘軍又以火
應之璘以爲官軍已濟江遽挈家屬與麾下潛遁及

明不見濟者乃復入城收兵具舟楫而去成式將趙
侃等濟江至新豐璘使瑒及其將高仙琦將兵擊之
侃等逆戰射瑒中肩璘兵遂潰璘與仙琦奔鄱陽收
庫物甲兵欲南奔嶺表江西採訪使皇甫侁討擒之
殺之於傳舍瑒亦死於亂兵同上高適渤海蓀人永
王起兵於江東欲據揚州初上皇以諸王分鎮適
切諫不可及永王叛肅宗聞其論諫有素召而謀之
適因陳江東利害永王必敗上奇其對以適兼御史
大夫揚州大都府長史詔與來瑱平江淮之亂適累
爲藩牧政存寬簡吏民便之舊唐書
適本傳權皋字士繇

秦州略陽人高適表試大理評事淮南採訪判官永王舉兵脅士大夫舉詭姓名以免元宗聞之拜監察

御史新唐書
卓行傳

上元元年十一月宋州刺史劉展赴鎮揚州揚州長史

鄧景山以兵拒之為展所敗展進陷揚潤昇等州舊唐書

紀宗

御史中丞李銑宋州刺史劉展皆領淮西節度副使銑貪暴不法展剛強自用故為其上者多惡之節度使王仲昇先奏銑罪而誅之使內左常侍邢延恩奏

展倔彊不受命延恩因請除展江淮都統代李暉俟

其釋兵赴鎮中道執之上從之以展為都統淮南東

江南西浙西三道節度使密敕舊都統李暉及淮南

東道節度使鄧景山圖之延恩以制書授展展疑之

因泣下延恩懼曰公素有才望主上以江淮為憂故

不次用公公反以為疑何哉展曰事苟不欺印節可

先得乎延恩曰可乃馳詣廣陵與暉謀解印節授展

展乃上表謝牒追江淮親舊置之心膺三道官屬遣

使迎賀申圖籍相望於道展悉舉宋州兵七千趣廣

陵延恩知展已得其情還奔廣陵與暉景山發兵拒

之移檄州縣言展反展亦移檄言暉反州縣莫知所

從暉引兵度江與副使潤州刺史韋儼浙西節度使
侯令儀屯京口鄧景山將萬人屯徐城展使其將孫
待封張灑雷擊之景山眾潰與延恩奔壽州展引兵
入廣陵遣其將屈突孝標將兵徇濠楚王暉將兵略
淮西暉關北固爲兵場插木以塞江口展軍於白沙
設疑兵於瓜洲多張火鼓若將趣北固者如是累日
暉悉銳兵守京口以待之展乃自上流濟襲下蜀暉
軍聞之自潰暉奔宣城甲午展陷潤州丙申陷昇州
初上命平盧兵馬使田神功將所部精兵三千屯任
城景山旣敗與延恩奏乞敕神功救淮南未報景山

遣人趣之且許以淮南金帛子女爲賂神功及所部
皆喜悉眾南下及彭城敕神功討展展聞之始有懼
色自廣陵將兵八千拒之選精兵二千度淮擊神功
於都梁山展敗走至天長以五百騎據橋拒戰又敗
展獨與一騎亡度江神功入廣陵大掠殺商胡以千
數城中地穿掘略徧通鑑唐紀三十七

二年春正月乙卯平盧軍兵馬使田神功生擒劉展

潤平

舊唐書
肅宗紀

春正月丁未神功使特進楊惠元等將千五百人西
擊王暉辛亥夜神功先遣特進范知新等將四千人

自白沙濟西趣下蜀鄧景山將千人自海陵濟東趣
 常州神功與邢延恩將三千人軍於瓜洲壬子濟江
 展將步騎萬餘陳於蒜山神功以舟載兵趣金山會
 大風五舟飄抵金山下展屠其二舟沈其三舟神功
 不得渡還軍瓜洲范知新等兵已至下蜀展擊之不
 勝弟殷勸展引兵逃入海展曰若事不濟何用多殺
 人父子乎死早晚等耳遂更率眾力戰將軍賈隱林
 射展中目而仆遂斬之殷等皆死安史之亂亂兵不
 及江淮至是其民始罹荼毒矣

通鑑唐紀三十八

二月癸亥以太子詹事崔圓為揚州大都督府長史崔

南節度觀察等使

舊唐書 肅宗紀

圓署李藏用為楚州刺史會支度租庸使以劉展之
 亂諸州用倉庫物無準奏請徵驗諸將往往賣產以
 償之藏用恐其及已與人言頗有悔恨其牙將高幹
 挾故怨使人詣廣陵告藏用反先以兵襲之藏用走
 追斬之圓遂簿責藏用將吏畏皆附成其狀獨孫待
 封堅言不反圓命引出斬之或曰子何不從眾以求
 生待封曰吾始從劉大夫奉詔書來赴鎮人謂吾反
 李公起兵滅劉大夫今又以李公為反如此誰則非
 反者乎吾寧就死不能誣人以非罪遂斬之

通鑑唐紀三十

代宗大曆十四年秋七月己卯詔王公卿士不得與民爭利諸節度觀察使於揚州置迴易邸並罷之舊唐書 德宗紀

德宗建中四年十一月淮南節度使陳少遊將兵討李

希烈屯盱眙聞朱泚作亂歸廣陵修塹壘繕甲兵發兵三千大閱於江北通鑑唐紀 四十五

鹽鐵使包佶有錢帛八百萬將輸京師少遊欲強取之佶不可少遊欲殺之佶懼匿妻子於案牘中急濟江少遊悉收其財帛佶有守財卒三千少遊亦奪之

同上

憲宗皇帝諱純貞元四年六月封廣陵郡王新唐書 憲宗紀

二十一年三月立廣陵郡王純為皇太子新唐書 順宗紀

宣宗大中十二年秋七月宣州都將康全泰作亂逐觀察使鄭薰薰奔揚州通鑑唐紀 六十五

懿宗咸通三年五月潤州人陳磻石上書言有奇計饋南軍引劉裕海路進軍破盧循故事以磻石為鹽鐵巡

官往楊子院專督海運舊唐書 懿宗紀

九年徐泗兵戍桂州求代作亂推糧料判官龐勛為志劫庫兵北還九月入淮南淮南節度使令狐綯遣使慰

勞給芻米

通鑑唐紀六十七

都押牙李湘言高郵岸峽水深請將奇兵伏其側可盡擒也絢素懦且以無敕書曰彼在淮南不為暴聽其自過餘非吾事也

同上

辛讜寓居廣陵與杜愔有

舊聞龐勛作亂詣泗州勸愔挈家避之愔曰安平享其祿位危難棄其城池吾不為也讜曰公能如是僕與公同死乃還廣陵與其家訣復如泗州

同上

令狐絢遣李湘將兵救泗州與賊戰大敗賊執湘送徐

州

同上

閏月己亥辛讜求救於淮浙夜帥敢死士十人乘小舟

潛往斫賊水寨而出癸卯至揚州見令狐絢

同上

十年四月辛讜復自泗州迎糧於揚潤賊夾岸攻之轉

戰百里乃得出至廣陵

同上

僖宗廣明元年三月授淮南節度使高駢為諸道兵馬

行營都統

舊唐書僖宗紀

駢遣其將張璘等擊黃巢屢捷盧攜奏以駢為諸道行營都統駢乃傳檄徵天下兵且廣召募得土客之

通鑑唐紀六十九

兵共七萬朝廷深倚之

同上

高駢奏改楊子院為發運使

五月己未出屯東塘

通鑑唐紀七十

雉雘於揚州廨舍占者云野鳥入室軍府將空駢心

惡之盡出兵於東塘結壘而處每日教閱如赴難之

勢仍與浙西周寶書請同入援京師寶大喜點閱將

赴之遣人偵之知其非實駢在東塘凡百餘日復還

廣陵

舊唐書高駢傳案駢傳載此事在二年

黃巢度江攻天長駢欲

縱賊以聳朝廷然後立功畢師鐸諫曰朝廷恃公制

賊要害莫先淮南今不據要津以滅賊使得北度必

亂中原駢矍然下令將出師嬖將呂用之畏師鐸有

功諫曰公勲業極矣賊未殄朝廷且有口語況賊平

抑震主之威安所稅駕不如觀釁求福為不朽資也

駢入其計託疾未可出屯嚴兵保境

新唐書叛臣傳下

以王鐸為京城四面諸道行營兵馬都統增駢階爵使

務並停駢上章論列語不遜明年鐸收復京城駢聞悔

恨部下多叛乃託求神仙屏絕戎政軍中可否取決於

呂用之

舊唐書高駢傳

初駢好神仙有方士呂用之坐妖黨亡命歸駢駢厚

待之補以軍職用之鄱陽茶商之子也久客廣陵熟

其人情爐鼎之暇頗言公私利病駢益竒之稍加信

任駢舊將梁纘陳珙馮綬董瑾俞公楚姚歸禮素為

駢所厚用之以計去之又引其黨張守一諸葛殷共
盡惑駢守一本滄景村民以術干駢無所遇窮困甚
用之謂曰但與吾同心勿憂不富貴遂薦於駢駢寵
待埒於用之殷始自鄱陽來用之先言於駢曰玉皇
以公職事繁重輟左右尊神一人佐公爲理公善遇
之欲其久留亦可縻以人閒重職明日殷謁見詭辨
風生駢以爲神補鹽鐵劇職駢嚴潔甥姪輩未嘗得
接坐殷病風疽搔捫不替手膿血滿爪駢獨與同席
促膝傳杯器而食左右以爲言駢曰神仙以此試人
耳駢有畜犬聞其腥穢多來近之駢怪之殷笑曰殷
嘗於玉皇前見之別來數百年猶相識駢與鄭畋有
隙用之謂駢曰宰相有遣劍客來刺公者今夕至矣
駢大懼用之曰張先生可以禦之守一乃使駢衣婦
人服潛於他室而代居駢寢榻中夜擲銅器於階令
鏗然有聲又密以囊盛醜血灑於庭宇如格鬪狀及
旦笑謂駢曰幾落奴手駢泣謝厚酬以金寶有魏勝
者賂用之求鹽城監駢有難色用之曰近得上仙書
云有寶劍在鹽城井中須一靈官往取之以勝上仙
左右之人欲使取劍耳駢乃許之勝至監數月函一
銅匕首以獻用之見稽首曰此北帝所佩得之則百

里之內五兵不能犯駢乃飾以珠玉常置坐隅用之
自謂磻溪真君謂守一乃赤松子殷乃葛將軍勝乃
秦穆公壻也用之又刻青石爲竒字云玉皇授白雲
先生高駢密令左右置道院香案駢得之驚喜用之
曰玉皇以公焚修功著將補真官計鸞鶴不日當降
此際用之等謫限亦滿必得陪幢節同歸上清耳是
後駢於道院庭中刻木鶴時著羽服跨之日夕齋醮
鍊金燒丹費以巨萬計用之微時依止江南后土廟
舉動祈禱及得志白駢崇大其廟極江南工材之選
又言神仙好樓居說駢作迎仙樓費十五萬緡又作
延和閣高八丈用之每對駢呵叱風雨仰揖空際云
有神仙過雲表駢輒隨而拜之然常厚賂駢左右使
伺駢動靜共爲欺罔駢不之寤左右小有異議者輒
爲用之陷死不旋踵駢倚用之如左右手公私大小
之事皆決於用之退賢進不肖淫刑濫賞駢之政事
於是大壞矣用之知上下怨憤恐有竊發請置巡察
使駢卽以用之領之募險獍者百餘人縱橫閭巷間
謂之察子民間呵妻詈子靡不知之用之欲奪人貨
財掠人婦女輒誣以叛逆撈掠取服破滅數百家將
吏士民重足屏氣又欲以兵威脅制諸將請選募諸

軍驍勇之士二萬人號左右莫邪都卽以守一及用
之爲左右莫邪軍使置將吏如帥府器械精利衣裝
華潔每出入導從近千人用之侍妾百餘人自奉奢
靡用度不足輒留三司綱輸其家用之猶慮人泄其
姦謀乃言於駢曰神仙不難致但恨學道者不能絕
俗累故不肯降臨耳駢乃悉去姬妾謝絕人事賓客
將吏皆不得見有不得已見之者皆先令沐浴齋祓
然後見拜起纔畢已復引出由是用之得專行威福
無所忌憚境內不復知有駢矣通鑑唐紀七十 呂用之父
璜以貨茗爲業來往於淮浙間璜卒用之孤且貧因

事九華山道士牛宏徽傳驅役考召之術宏徽旣死
用之復客廣陵遂穀巾布褐用符藥以易衣食歲餘
丞相劉公節制淮左有蠱道冥法者逮捕甚急用之
懼遂南度時高駢鎮京口召致方伎之士用之以其
術通於客次逾月不召詣渤海親人俞公楚公楚奇
之迺爲儒服目之曰江西呂巡官薦於渤海及召試
公楚與左右附會其術得驗尋署觀察推官仍爲制
其名因字之曰無可明年渤海移鎮用之固請戎服
遂署右職羅隱廣陵妖亂志 諸葛殷用之黨也自鄱陽詣
廣陵用之先謂駢曰玉皇遣左右一尊神爲令公道

中羽翼明日殷果來遂巾褐見駢於碧筠亭妖形鬼
態辨詐蜂起謂可以坐召神仙立變寒暑駢神靈遇
之每從容酒席間聽其鬼怪之說盡日忘倦累遷鹽
鐵劇職聚財數十萬緡其凶邪陰狡用之蔑如也有
大賈周師儒者其居處花木樓榭之奇爲廣陵甲第
殷謂駢曰府城內當有妖起使其得志非水旱兵戈
之匹也駢曰爲之奈何殷曰當就其下建齋壇請靈
官鎮之殷卽指師儒第爲處駢命軍候驅出其家是
時雨雪驟降泥淖方盛執事者鞭撻迫蹙師儒攜挈
老幼匍匐道路觀者莫不愕然殷遷其族而家焉殷
性躁虐知揚州院未兩月官吏數百人鞭背殆半光
啓二年僞授御史中丞加金紫同初用之因左驍
衛俞公楚得見高駢用之橫甚或以咎公楚公楚數
戒用之少自斂毋相累用之銜之右驍雄軍使姚歸
禮氣直敢言尤疾用之所爲時而數其非常欲手刃
之用之與其黨會倡家歸禮潛遣人焚其室殺貌類
者數人用之易服得免窮治其事獲縱火者皆驍雄
之卒於是日夜譖二將於駢未幾駢遣二將將驍雄
卒三千襲賊於慎縣用之密以語楊行愍曰公楚歸
禮欲襲廬州行愍發兵掩之二將不爲備舉軍盡殪

以二將謀亂告駢駢不知用之謀厚賞行愍通鑑唐紀七十一

一行愍本廬州牙將勇敢屢有戰功都將忌之白

刺史郎幼復連使戍外行愍過辭都將甘言問所須

行愍曰正須汝頭耳遂起斬之自稱八營都知兵馬

使幼復不能制薦於高駢請以自代駢以行愍為淮

南押牙知廬州事朝廷因而命之上同高駢命行愍

更名行密通鑑唐紀七十二

光啓二年二月襄王僭即皇帝位偽制加諸侯官爵以

淮南節度使檢校太尉兼侍中高駢為太師中書令江

淮鹽鐵轉運諸道行營兵馬都統又以淮南右都押衙

和州刺史呂用之檢校兵部尚書兼廣州刺史嶺南東

道節度使舊唐書僖宗紀案案熹

用之建牙開幕一與駢同凡駢之腹心及將校能任

事者皆逼以從已諸所施為不復咨稟駢頗疑之陰

欲奪其權而根帶已固無如之何用之懼訪於其黨

鄭杞董瑾杞曰曹孟德有言寧我負人毋人負我明

日與瑾共為書一緘授用之其語祕人莫有知者通鑑

唐紀七十二

六月鎮海節度使周寶遣牙將丁從實襲常州逐張郁

郁奔海陵依鎮遏使高霸同上

霸高駢將鎮海陵有民五萬戶兵三萬人同上

三年四月甲辰朔揚州牙將畢師鐸自高郵率戍兵攻

揚州下之囚高駢於別室自總軍政

舊唐書
僖宗紀

蔡賊孫儒兵掠定遠聲言涉淮駢令畢師鐸率騎三百戍高郵師鐸有妾美用之請見不可狙其出觀焉怒而棄之內忿懼爲子結婚於高郵將張神劍陰以爲援師鐸見駢府宿將多以讒死憂甚用之益加禮師鐸愈恐謀於神劍神劍不然其言而猜嫌日結用之欲除之亟請罷屯其母密撻師鐸使去師鐸憂未知所出而駢子怒用之專恣覲師鐸與諸將發其姦

使謂師鐸曰用之欲因此行圖君既授書神劍矣君其備之師鐸驚軍中傳言諸將介而見請殺神劍并其軍驅市人以濟亂師鐸曰不可我若重擾百姓復一用之也鄭漢璋素與我善兵精士強以用之用事常不平今若告之謀彼必喜則事濟矣眾然之神劍未知方椎牛釀酒且將犒師師鐸潛師夜出土皆絳繒抹首且行且掠漢璋聞以麾下出迎師鐸諭以計大喜留其妻守淮口帥兵及亡命數千至高郵見神劍詰其變神劍辭不知師鐸語稍侵神劍瞋目曰大夫何晚計彼一妖人前假嶺南節不肯行志圖淮海

令君既奪魄彼一日得志吾能握刀頭北面事之耶
吾前未量君意故不出口尚何疑漢璋喜取酒割臂
血而盟推師鐸爲大丞相作誓告神乃移檄州縣以
誅呂用之張守一諸葛殷爲名將發神劍中悔漢璋
恐不爲已下許城破玉帛子女共之四月兵傳城城
中駭亂用之分兵守且自督戰令曰斬一級賞金一
餅士多用命師鐸退舍自固用之稍堙塞諸門駢登
延和閣聞囂甚左右告之故大驚召用之問狀徐曰
師鐸猥思歸爲門衛所軋隨已處置不爾煩元女一
符耳駢曰吾覺爾之誕多矣善自爲之師鐸見城未

下頗懼

通鑑云退屯山光寺

求救於宣州秦彥約事平迎以代

駢駢數責用之曰始吾以心腹任君君御下無方卒
誤我今百姓饑饉不可虐用當遣大將齎吾書往諭
之使罷兵用之疑諸將不爲用以其黨許戡奉書往
始師鐸意駢令宿將勞軍因得口陳用之罪及戡至
大怒卽斬之乃繫書射城內用之不發火之他日以
甲士百人入謁駢驚叱曰得非反耶命左右驅出用
之至南門舉策曰吾不復入是矣始與駢貳師鐸壁
楊子發民廬舍治攻具駢召大將古鏐齎師鐸母書
及其子出諭師鐸遣子還曰不敢負恩朝斬凶人夕

還屯願以妻子爲質駢恐用之屠其家乃收置署中
會秦彥遣秦稠率兵與師鐸合攻益急守陴者夜焚
南柵以應外師鐸入守將張全迺戰死用之距三橋
殺傷相當駢從子傑將執用之以昇師鐸左鎮邪兵
復斷其後用之懼乃奔駢召梁纘授以兵使保子城
遲明師鐸縱火大掠駢乃命徹備改服須其入師鐸
見延和閣駢待之如賓卽署師鐸節度副使漢璋神
劍以次授署秦稠封府庫以待師鐸去丞相號誅用
之支黨數十使孫約迎秦彥或曰足下向誅妖人羣
下樂從今軍府已安宜還政高公足下身典兵權在

掌握四鄰聞之不失大義諸將未敢謀也若令彥爲
帥兵非足下有也且秦稠封府庫勢已相疑足下如
厚德彥宜以金玉子女報之勿聽度江假足下能下
彥楊行密夕聞而朝必至師鐸不決以告漢璋漢璋
曰善師鐸出駢囚南第稠麾下求無厭燒貢奉樓取
珍寶師鐸徙駢東第擒諸葛殷腰下得金數斤百姓
交唾拔鬚髮無遺再縊乃絕仇家矐其目去市人投
瓦礫擊尸俄而成冢駢出金遺守者師鐸知之加兵
苛督復入囚署中子弟十餘人同幽之用之奔天長

新唐書叛
臣傳下

張神劍名雄人以其善用劍故謂之神

劍 通鑑唐紀
七十三

前蘇州刺史張雄帥其眾自海沂江屯於東塘 同上

五月揚州牙將畢師鐸召宣州觀察使秦彥入揚州推

爲節度使 舊唐書
僖宗紀

九月辛未朔淮南節度使高駢爲其牙將畢師鐸所殺

楊行密急攻廣陵蔡賊秦宗權遣其將孫儒將兵三萬

度淮爭揚州城中食盡 同上

初用之詐爲駢書召兵於廬鳳城陷而楊行密兵萬

人次天長用之自歸張神劍求賂於師鐸辭以彥未

至神劍怒與別將高霸將攻師鐸彥入揚州稱節度

使以師鐸爲行軍司馬居用之第不得在牙中師鐸

怏怏失志行密與神劍等連和自江北至槐家橋柵

壘相望彥登樓望之色沮乃授鄭漢璋唐宏等兵屯

門樵蘇道絕食且乏糲及師鐸以勁卒八千出戰大

敗稠死之士奔溺死者十八彥使師鐸率兵三萬陳

城下漢璋爲前鋒宏次之駱元真樊約又次之師鐸

王朗以騎爲左右翼旣成列行密乃出委輜重於壁

以羸兵守之伏精卒數千其旁行密先犯元真短兵

接僞北師鐸諸軍奔其壁爭取金玉貲糧伏謀而出

一行密引輕兵躡其尾俘殺旁午橫尸十里師鐸等奔

還元真戰死師鐸恠沮彌日不復議出戰矣駢久囚
拘供億窘狹羣奴徹延和閣闌檻爲薪煮革帶以食
駢召幕府盧況曰子粗立功比求清淨非與此世爭
利害今而及此神道何望耶涕下不能已師鐸旣敗
慮駢內應有女巫王奉仙謂師鐸曰揚州災有大人
死可以厭彥曰非高公耶命左右陳賞等往殺之侍
者白有賊駢曰此必秦彥來正色須之眾入曳廷下
數之曰公負天子恩陷人塗炭罪多矣尙何云駢未
暇荅卽斬之左右奴客遁歸行密行密舉軍縞素大
臨而祭獨用之縗服哭三日新唐書叛秦畢害高

駢於幽所少長皆死同坎瘞於道院北垣下舊五代史楊行

密彥遣其將張神劍統兵屯灣頭山光寺行密屯

大雲寺舊唐書秦彥傳案大雲寺舊五代史作大明寺

十月秦彥遣鄭漢章將步騎五千出擊張神劍高霸寨

破之神劍奔高郵霸奔海陵通鑑唐紀七十三案漢章新舊唐書皆作漢章

秦彥畢師鐸潰圍奔於孫儒軍行密入據揚州舊唐書僖宗紀

行密以城尙堅師且老議解去用之裨將晨伏兵西

濠伺守者休代引而登殺數十人於門以招外軍守

軍亦厭苦皆委兵潰師鐸與其家及彥奔東塘人爭

出相騰藉死濠塹幾滿行密旣入殺梁纘以不死高

氏難韓問聞之赴井死居人癩瘼奄奄兵不忍加暴
反斥餘糧救之彥師鐸與唐宏倪詳焚白沙將度江
會秦宗權使孫儒引兵三萬襲揚州次天長彥等與
之合還攻行密用之始詐行密曰廡下有瘞金五千
斤事平願備一日乏行密掘地無埋金但得銅人三
尺身桎梏釘刺其口刻駢名於背蓋用蠱厭駢也行
密責其罪并張守一斬於三橋妻子皆死著其罪於
路駢之死裏以故氈與子弟七人一坎而瘞行密擢
駢孫愈爲副使令主喪事未克葬愈暴死故吏鄺師
虔收葬之新唐書叛臣傳下 楊行密圍廣陵且半年秦彥

畢師鐸大小數十戰皆不利城中無食斗米直錢五

十縑草根木實皆盡以葶泥爲餅食之餓死者大半

宣軍掠人詣肆賣之驅縛屠割如羊豕訖無一聲積

骸流血滿於坊市通鑑唐紀七十三 呂用之之敗也其黨

鄭杞首歸師鐸師鐸署杞知海陵監事杞至海陵陰

記高霸得失聞於師鐸霸獲其書杖杞背斷手足剝

目截舌然後斬之同上

楊行密自稱淮南留後同上

十一月秦彥引孫儒之兵攻廣陵楊行密遣使求援於

朱全忠制授全忠檢校太尉侍中兼揚州大都督府長

史充淮南節度觀察等使行營兵馬都統汴將李璠帥師至淮口以援之

舊唐書
僖宗紀

孫儒分兵掠鄰州衆至數萬以城下乏食與彥師鐸襲高郵辛巳高郵鎮遏使張神劍帥麾下二百人逃歸揚州丙戌孫儒屠高郵戊子高郵殘兵七百人潰圍而至行密慮其爲變一夕盡阬之殺神劍於其第行密恐儒乘勝取海陵壬寅命高霸帥其兵民悉歸府城於是數萬戶棄資產焚廬舍挈老幼遷於廣陵戊戌霸與弟晔部將余繞山前常州刺史丁從實至廣陵行密出郭迎之與霸晔約爲兄弟置其將卒於

法雲寺朝廷以淮南久亂以朱全忠兼淮南節度使

東南面招討使行密欲遣高霸屯天長以拒孫儒袁

襲曰霸高氏舊將常挾兩端不如殺之已酉行密伏

甲執霸及從實繞山皆殺之又遣千騎掩殺其黨於

法雲寺死者數千人是日大雪寺外數坊地皆赤高

晔出走明日獲而殺之

通鑑唐紀
七十三

文德元年春正月孫儒斬秦彥畢師鐸於高郵

舊唐書
僖宗紀

二月朱全忠奏以楊行密爲淮南留後

通鑑唐紀
七十三

夏四月壬午孫儒襲揚州克之楊行密出走儒自稱淮

南節度使行密歸廬州

同上

昭宗龍紀元年朱全忠遣龐師古將兵自潁上趨淮南

擊孫儒通鑑唐紀七十四

十二月戊寅孫儒自廣陵引兵度江壬午逐田頔取常

州以劉建鋒守之儒還廣陵建鋒又取潤州同上

孫儒出攻宣州行密乘虛襲據揚州北通時溥孫儒引

軍復攻行密舊五代史楊行密傳

大順元年行密危蹙率眾夜遁出據宣州儒復入揚州

同上

龐師古等眾號十萬度淮聲言救楊行密攻下天長高

郵通鑑唐紀七十四

葛從周佐龐師古討孫儒於淮南下天長高郵破邵伯

堰舊五代史從周本傳案薛史載此事云在文德元

年又龐師古傳云朱珍以罪誅遂用師古為都指揮使度淮破天長下高郵朱珍傳云龍紀初以斬李唐賓誅則師古渡淮在龍紀之後而從周傳可決知其誤蓋與通鑑所載同

一事故次於此

二月龐師古與孫儒戰於陵亭師古兵敗而還楊行密

遣其將馬敬言將兵五千襲據潤州通鑑唐紀七十四

六月孫儒求好於朱全忠全忠表為淮南節度使未幾

全忠殺其使者遂復為仇敵同上

二年四月楊行密遣其將劉威朱延壽將兵三萬擊孫

儒於黃池威等大敗孫儒軍於黃池五月大水諸營皆

沒乃還揚州同上

朱全忠遣使與楊行密約共攻孫儒儒悉焚揚州廬舍

驅丁壯及婦女度江殺老弱以充食行密將張訓李德

成潛入揚州滅餘火得穀數十萬斛以賑饑民同上

景福元年六月戊寅楊行密陷揚州新唐書昭宗紀案舊書載此事在

大順二年三月

行密聞儒病瘧戊寅縱兵擊之會大雨晦冥儒軍大

敗安仁義破儒五十餘寨田頵擒儒於陳斬之傳首

京師儒眾多降於行密丁酉行密帥眾歸揚州七月

丙辰至廣陵表田頵守宣州安仁義守潤州先是揚

州富庶甲天下時人稱揚一益二及經秦畢孫楊兵

火之餘江淮之間東西千里掃地盡矣通鑑唐紀七十五

八月以楊行密為淮南節度使同平章事同上

孫儒降兵多蔡人行密選其尤勇健者五千人厚其

稟賜以皂衣蒙甲號黑雲都每戰先登陷陳四鄰畏

之同上淮南被兵六年士民轉徙幾盡行密初至賜

與將吏帛不過數尺錢不過數百而能以勤儉足用

非公宴未嘗舉樂招撫流散輕刑薄斂未及數年公

私富庶幾復承平之舊同上

十一月廬州刺史蔡儔發楊行密父祖墓行密遣行營

都指揮使李神福將兵討儔同上

二年四月甲午行密自將詣廬州七月丁亥克廬州斬

蔡儔同上

乾寧二年楊行密攻濠州拔之執刺史張璠行密軍士

掠得徐州李氏子行密養以為子通鑑唐紀七十六

李昇字正倫世本微賤父榮遇唐末之亂不知其所

終昇少孤流寓濠泗間楊行密攻濠州得之奇其狀

貌養以為己子而楊氏諸子不能容行密以乞徐温

乃冒姓徐氏名知誥五代史南唐世家

乾寧四年正月葛從周將兵襲兗州二月戊申入兗州

朱瑾帥眾趨沂州刺史尹處寶不納走保海州為汴兵

所逼與史儼李承嗣擁州民度淮奔楊行密行密逆之

於高郵表瑾武寧軍節度使通鑑唐紀七十七

淮南舊善水戰不知騎射及得河東兗鄆兵軍聲大

振儼承嗣皆河東驍將李克用深惜之遣使間道詣

行密請之行密許之亦遣使詣克用修好同上

詔以楊行密為江南諸道行營都統同上

八月鍾傳欲討吉州刺史襄陽周琲琲帥其眾奔廣陵

同上

九月湖州刺史李彥徽欲以州附於楊行密其眾不從

彦徽奔廣陵同上

光化二年春正月朱全忠遣崔賢還蔡州發兵詣大梁
二月蔡將崔景思等殺賢悉驅兵民度淮奔楊行密兵
民稍稍遁歸至廣陵者不滿二千人同上

天復二年三月以左金吾將軍李儼為江淮宣諭使書
御札賜楊行密拜行密東面行營都統中書令吳王通鑑

唐紀七十九

儼張濬之子也賜姓李同上

六月武寧節度使馮宏鐸至東塘同上

宏鐸介居宣揚之間常不自安然恃樓船之疆不事

兩道寧國節度使田頔欲圖之宏鐸將馮暉顏建說

宏鐸先擊頔宏鐸從之率眾襲宣州頔逆擊於葛山

大破之宏鐸收餘眾沿江將入海楊行密恐為後患

遣使犒軍且說之宏鐸至東塘行密自乘輕舟迎之

從者十餘人常服不持兵升宏鐸舟慰諭之舉軍感

悅署宏鐸淮南節度副使館給甚厚同上 案葛山唐書作曷山

九月錢鏐以徐許之難遣顧全武告急於楊行密同上

全武請得王子為質鏐命其子傳瑒微服為全武僕

與偕之廣陵全武至說行密曰使田頔得志必為王

患王召頔還錢王請以其子為質且求昏行密許之

以女妻傳璟同

冬十月李儼至揚州楊行密始建制敕院每有封拜輒以告儼於紫極宮元宗像前陳制書再拜然後下同

三年九月楊行密殺奉國軍節度使朱延壽十二月行

密陷宣州寧國軍節度使田頔死之

新唐書昭宗紀

初田頔破馮宏鐸詣廣陵謝行密因求池歛爲巡屬行密不許頔還指廣陵南門曰吾不可復入此矣頔兵彊財富好攻取行密既定淮南欲保境息民每抑止之頔不從及解釋錢鏐頔尤恨之遂與潤州團練使安仁義同舉兵仁義悉焚東塘戰艦頔遣二使詐

爲商人詣壽州約奉國節度使朱延壽行密將尚公迺遇之曰日非商人也殺一人得其書以告行密行密召李神福於鄂州以討頔行密夫人延壽之姊也行密狎侮延壽延壽怨怒陰與頔通謀頔遣前進士杜荀鶴至壽州與延壽相結又遣告朱全忠全忠遣兵屯宿州以應之延壽謀頗泄行密僞爲目疾對延壽使者多錯亂所見或觸柱仆地謂夫人曰吾不幸失明諸子皆幼軍府事當悉以授三舅夫人屢以書報延壽行密又自遣召之陰令徐溫爲之備延壽至廣陵行密迎及寢門執而殺之部兵驚擾徐溫諭之

皆聽命遂斬延壽兄弟黜朱夫人十二月田頵帥死
士出戰臺濛擊頵斬之行密與頵同閭里少相善約
為兄弟頵首至廣陵行密視之泣下赦其母殷氏行
密與諸子皆以子孫禮視之通鑑唐紀八十

天祐元年八月楊行密以其子渥為宣州觀察使通鑑唐紀八十

二年正月楊行密殺平盧節度使安仁義新唐書昭宣帝紀

仁義勇決得士心淮南將王茂章攻之踰年不克行
密使謂之曰汝之功吾不忘也能束身自歸當以為
行軍副使但不掌兵耳仁義不從茂章為地道入城

遂克之仁義舉族登樓眾不敢逼李德誠掖之而下
并其子斬於廣陵市通鑑唐紀八十一

二月朱全忠遣其將曹延祚將兵與杜洪共守鄂州淮
南將劉存攻拔之執洪延祚及汴兵千餘人送廣陵悉
誅之同上

九月梁兵攻破襄州趙匡凝奔於行密五代史吳世家

匡凝至廣陵行密厚遇之行密死楊渥稍不禮之渥
方宴食青梅匡凝顧渥曰勿多食發小兒熱諸將以
為慢渥遷匡凝於海陵後為徐溫所殺五代史匡凝本傳

冬十月楊渥至廣陵楊行密承制以渥為淮南留後通鑑

唐紀八

十一

十一月庚辰吳忠武王楊行密薨將佐共請宣諭使李儼承制授楊渥淮南節度使東面諸道行營都統兼侍中宏農郡王同上

三年四月江西鍾傳卒子匡時代立渥遣秦裴率兵攻之九月克洪州執匡時及其司馬陳象以歸斬象於市

五代史吳世家

五代

四年梁太祖開平元年時吳仍稱天祐正月左右牙指揮使張顥徐溫

帥牙兵誅渥親信十餘人通鑑後梁紀一

渥既得江西驕侈益甚居喪晝夜酣飲作樂然十圍之燭以擊毬一燭費錢數萬或單騎出遊從者奔走不知所之張顥徐溫泣諫渥怒曰汝謂我不才何不殺我自為之二人懼渥選壯士號東院馬軍廣署親信為將吏所署者恃勢驕橫陵蔑勳舊溫顥潛謀作亂渥父行密之世有親軍數千營於牙城之內渥遷出於外以其地為射場顥溫由是無所憚渥之鎮宣州命指揮使朱思勅范思從陳璠將親兵三千人及嗣位召歸廣陵顥溫使三將從秦裴擊江西因戍洪州誣以謀叛命別將陳祐往誅之祐至洪州微服懷

短兵徑入秦裴帳中裴大驚祐告之故乃召思勅等飲酒執而斬之渥聞三將死益忌顥温欲誅之丙戌渥視事顥温帥牙兵二百露刃直入庭中渥曰爾果欲殺我邪對曰欲誅左右亂政者耳因數渥親信十餘人之罪曳下以鐵槌擊殺之謂之兵諫諸將不與同謀者稍以法誅之於是軍政悉歸二人渥不能制

五年開平二年五月張顥徐温謀共弒王分其地以臣於梁

戊寅顥遣其黨紀祥等弒王於寢室詐言暴薨奉威王

弟隆演稱淮南留後東面諸道行營都統同案隆演舊五代史

渭作

渥死顥欲自立温患之其客嚴可求出渥母史氏教言楊氏創業艱難而嗣王不幸隆演以次當立告諸將以無負楊氏而善事之辭旨激切聞者感動顥氣色皆沮隆演乃得立由此與温有隙五代史吳世家

徐温與張顥有隙使鍾章殺之温因盡殺紀祥等歸殺渥之罪於顥温遂專政同上案鍾章通鑑作鍾泰章

顥諷隆演出温潤州可求謂温曰禍行至矣因說顥止温温由是不行顥使客刺可求不能中明日可求

詣温謀先殺顥陰遣鍾章選壯士三十人就衙堂斬

顥同初温與顥謀殺威王温曰參用左右牙兵心

必不一不若獨用吾兵顥不可温曰然則獨用公兵

顥從之至是窮治逆黨皆左牙兵也由是以温為

實不知謀隆演以温為左右牙都指揮使軍事咸取

決焉以嚴可求為揚州司馬先是張顥用事刑罰酷

濫縱親兵剽奪市里温立法度禁強暴舉大綱軍民

安之以軍旅委嚴可求以財賦委支計使駱知祥皆

稱其職淮南謂之嚴駱通鑑後梁紀一

七月壬申淮南將吏請於李儼承制授楊隆演淮南節

度使東面諸道行營都統同平章事宏農王上同

六年開平三年三月徐温以金陵形勝戰艦所聚乃自以為

淮南行軍副將領昇州 史留廣陵以其假子元從指

揮使知誥為昇州防遏兼樓船副使往治之通鑑後梁紀二

四月淮南初置選舉以駱知祥掌之同上

七年開平四年二月萬全感自岐歸廣陵岐王承制加宏農

王兼中書令嗣吳王於是吳王赦其境內同上

九年乾化二年九月徐温帥將吏請於李儼承制加嗣吳王

隆演太師吳王以温領鎮海節度使同平章事通鑑後梁紀三

十二年梁均王貞明元年八年吳以鎮海軍節度使徐温為管

丙水陸馬步諸軍都指揮使兩浙都招討使守侍中齊國公鎮潤州以昇潤常宣歙池六州為巡屬軍國庶務

參決如故留徐知訓居廣陵秉政通鑑後梁紀四

十三年貞明二年二月辛丑夜吳宿衛將馬謙李球劫吳王

登樓發庫兵討徐知訓壬寅謙等陳於天興門外諸道

副都統朱瑾自潤州至擒謙球斬之同上

十五年貞明四年四月副都統朱瑾殺徐知訓瑾自殺潤州

徐知誥聞亂率兵入殺唐宣諭使李儼以止亂遂秉政

五代史吳世家

知訓驕倨淫暴狎侮吳王無復君臣之禮嘗與王為

優自為參軍使王為蒼鵲總角弊衣執帽以從泛舟

濁河王先起知訓以彈彈之又賞花於禪智寺知訓

使酒悖慢王懼而泣四座股栗左右扶王登舟知訓

乘輕舟逐之不及以鐵槌殺王親吏將佐無敢言者

溫皆不之知知訓及弟知詢皆不禮徐知誥獨季弟

知諫以兄禮事之知訓嘗召兄弟飲知誥不至知訓

怒曰乞子不欲酒欲劍乎又嘗與知誥飲馬令南唐書云飲於

山光寺伏甲欲殺之知諫躡知誥足陽起如廁遁去知

訓以劍授刁彥能使追殺之彥能馳騎及於中塗舉

劍示知誥而還以不及告平盧節度使同平章事諸

道副都統朱瑾遣家妓通候問於知訓知訓強欲私之瑾已不平知訓惡瑾位加已上出瑾爲靜淮節度使瑾益恨之然外事知訓愈謹瑾有所愛馬冬貯於幄夏貯於幃寵妓有絕色知訓過別瑾置酒自捧觴出寵妓使歌以所愛馬爲壽知訓大喜瑾因延之中堂伏壯士於戶內出妻陶氏拜之知訓荅拜盡以笏自後擊之踣地呼壯士出斬之瑾先繫二悍馬於廡下將圖知訓密令人解縱之馬相蹶齧聲甚厲以是外人莫之聞瑾提知訓首出知訓從者數百人皆散走瑾馳入府以首示吳王曰已爲大王除害王懼以衣朝面走入內曰舅自爲之我不敢知瑾曰婢子不足以成大事以知訓首擊柱挺劍將出子城使翟虔已闔府門勒兵討之乃自後踰城墜而折足顧追者曰吾爲萬人除害以一身任患遂自剄徐知誥在潤州聞難用宋齊邱策卽日引兵濟江瑾已死因撫定軍府時徐溫諸子皆弱乃以知誥代知訓執吳政沈朱瑾尸於雷塘而滅其族瑾之殺知訓也泰寧節度使米志誠從十餘騎問瑾所向聞其已死乃歸宣諭使李儼貧困寓居海陵溫疑其與瑾通謀皆殺之七月溫入朝疑諸將皆預朱瑾之謀欲大行誅戮徐知

誥嚴可求具陳知訓過惡温怒稍解乃命網瑾骨於雷塘而葬之責知訓將佐不能匡救皆抵罪獨刁彥能有諫書賞之戊戌以知誥爲淮南節度行軍副使內外馬步都軍副使通判府事兼江州團練使温還鎮金陵庶政皆決於知誥知誥悉反知訓所爲事吳王盡恭接士大夫以謙御眾以寬約身以儉以吳王命悉蠲天祐十三年以前逋稅餘俟豐年乃輸之求賢才納規諫除姦猾杜請託士民翕然歸心先是吳有丁口錢又計畝輸錢錢重物輕民甚苦之齊邱說知誥以爲錢非耕桑所得今使民輸錢是教民棄本

逐末也請蠲丁口錢自餘稅悉輸穀帛紬絹匹直千

錢者當稅三千知誥從之由是江淮間曠土盡闢桑柘滿野國以富强知誥欲進用齊邱而徐温惡之以爲殿直軍判官知誥每夜引齊邱於水亭屏語常至夜分或居高堂悉去屏障獨置大爐相向坐不言以鐵筋畫灰爲字隨以匙滅去之故其所謀人莫得知也

通鑑後梁紀五

知誥起延賓亭以待四方之士

馬令先主書

吳武義元年

貞明五年

二月温率將吏請隆演卽天子位不

許夏四月温奉玉册寶綬尊隆演卽吳王位建宗廟社稷設百官如天子之制改天祐十六年爲武義元年大

赦境內追尊行密孝武王廟號太祖渥景王廟號烈祖
拜溫大丞相都督中外諸軍事封東海郡王以徐知誥
為左僕射參知政事嚴可求為門下侍郎駱知祥為中
書侍郎文武以次進位封宗室皆郡公

五代史 吳世家

宮殿文物皆用天子禮以金繼土臘用丑

通鑑後 梁紀五

二年貞明六年五月隆演卒隆演少年嗣位權在徐氏及建

國稱制非其意常怏怏酣飲稀復進食遂至疾卒年二

十四謚曰宣弟溥立

五代史 吳世家

吳順義元年

梁改龍 德元年

冬十一月祀天於南郊御天興樓

大赦

同上

徐溫勸吳王祀南郊或曰禮樂未備且唐祀南郊費

巨萬今未能辦也溫曰安有王者而不事天乎事天

貴誠多費何為甲子祀南郊配以太祖

通鑑後 梁紀六

四年

唐莊宗同 光二年

溥至白沙闕舟師徐溫來見以白沙為

迎鑾鎮

五代史 吳世家

先是溫以親吏翟虔為閤門宮城武備等使使察王
起居虔防制王甚急至是王對溫名兩為水溫請其
故王曰翟虔父名吾諱之熟矣因謂溫曰公忠誠我
所知也然翟虔無禮宮中及宗室所須多不獲溫頓
首謝罪請斬之王曰斬則太過遠徙可也乃徙撫州

通鑑後 唐紀二

七年

唐明宗天 成二年

十月徐溫卒追封為齊王

舊五代史 楊溥傳

初溫子行軍司馬忠義節度使同平章事知詢以其兄知誥非徐氏子數請代之執政溫曰汝曹皆不如也嚴可求徐玠等言之不已溫欲帥諸藩鎮入朝勸吳王稱帝將行有疾乃遣知詢奉表勸進因留代知誥知誥草表欲求洪州節度使俟旦上之是夕溫凶問至乃止知詢亟歸金陵吳主贈溫齊王謚曰忠武

通鑑後 唐紀五

十一月庚戌溥御文明殿即皇帝位改元乾貞大赦境

內追尊行密武皇帝渥景皇帝隆演宣皇帝以徐知誥為太尉兼侍中拜溫子知詢輔國大將軍金陵尹治溫

舊鎮

五代史 吳世家

吳乾貞二年

天成三年

春正月吳主立子璉為江都王

通鑑 後唐

紀五

吳太和元年

天成四年

十一月徐知詢夾朝知誥誣其有反

狀留之不遣以為左統軍斬其客將周廷望以徐知諤為金陵尹大赦境內改元太和以徐知誥為中書令

史吳 世家

知詢自以握兵據上流意輕知誥數與知誥爭權內

相猜忌知誥患之知詢待諸弟薄諸弟皆怨之徐玠
知知詢不可輔反持其短以附知誥吳越王鏐遺知
詢金玉鞍勒器皿皆飾以龍鳳知詢乘用之知詢典
客周廷望說知詢捐寶貨以結朝中勳舊知詢從之
使廷望如江都廷望與知誥親吏周宗善密輸款於
知誥亦以知誥陰謀告知詢知詢召知誥詣金陵除
父喪知誥稱吳主之命不許周宗謂廷望曰人言侍
中有不臣七事宜亟入謝廷望還以告知詢十一月
知詢入朝知誥留爲統軍領鎮海節度使徵金陵兵
還江都知誥自是始專吳政知詢責知誥曰先王違
世兄爲人子不臨喪可乎知誥曰爾挺劍待我我何
敢往爾爲人臣畜乘輿服物亦可乎知詢又以廷望
所言詰知誥知誥曰以爾所爲告我者亦廷望也遂

斬廷望通鑑後唐紀五

一年唐改長興元年三月吳主立江都王璉爲太子通鑑後唐紀六

三年長興二年十一月吳中書令徐知誥請歸老金陵乃以

知誥爲鎮海寧國節度使鎮金陵總錄朝政如徐溫故
事以其子兵部尙書景通爲司徒同平章事知中外左

右諸軍事留江都輔政同上

四年長興三年封知誥東海王五代史吳世家

五年長興四年五月宋齊邱勸徐知誥徙吳主都金陵知誥

乃營宮城於金陵通鑑後唐紀七

六年唐潞王清泰元年二月吳主遣宋齊邱如金陵諭知誥罷

遷都通鑑後唐紀八

先是知誥久有傳禪之意以吳主無失德恐眾心不悅欲待嗣君齊邱亦以為然一旦知誥臨鏡鑷白鬚歎曰國家安而吾老矣奈何周宗知其意請如江都微以傳禪意諷吳主且告齊邱齊邱以宗先已心疾之遣使馳詣金陵手書切諫知誥愕然後數日齊邱至請斬宗以謝吳主乃黜宗為池州副使久之節度

副使李建勳行軍司馬徐玠等屢陳知誥功業宜早

從民望召宗復為都押牙知誥由是疎齊邱同

十一月徐知誥召其子司徒同平章事景通還金陵以

次子牙內馬步都指揮使海州團練使景遷為左右軍

都軍使左僕射參政事留江都輔政同

天祚元年清泰二年九月大赦改元知誥進位太師天下兵

馬大元帥封齊王五代史吳世家案馬書云太和五年進封齊王

二年晉高祖天福元年十二月鎮南節度使李德誠德勝節度

使周本帥諸將詣江都表吳主陳知誥功德請行冊命

通鑑後晉紀一

本以昏耄不知時變皆少子祚左右其事本隨眾至

建康勸進愧恨數月而卒

馬令書本本傳案祚通鑑作宏祚

唐昇元元年

晉高祖天福二年

九月丙寅吳主命江夏王璘奉

璽綬於齊冬十月甲申齊王誥即皇帝位於金陵大赦

改元國號唐追尊太祖武王曰武皇帝

通鑑後晉紀二案知誥於是

年二月更名誥

以廣陵為東都改東都尚書省為留守院

陸游南唐書烈祖紀

以揚州海陵縣為泰州

馬令先主書

已丑唐主表讓皇改東都宮殿名皆取於仙經讓皇嘗

服羽衣習辟穀術辛卯吳宗室建安王珙等十二人皆

降爵為公

通鑑後晉紀二案十二人陸書作十一人今可知者惟濛澈琪璉璘璠璪八人濛又

前降餘皆無考未知孰是

十一月戊午立子景遂為吉王以景遂為侍中東都留

守江都尹帥留守百官赴東都

同上

二年

天福三年

四月吳讓皇固辭舊宮屢請徙居五月改潤

州牙城為丹陽宮以李建勳為迎奉讓皇使壬戌徙讓

皇居丹陽宮

同上

十一月辛未吳讓皇卒唐主廢朝二十七日追謚曰睿

皇帝

同上

案陸書作十二月辛丑殂

三年

天福四年

春正月唐主復姓李立唐宗廟

通鑑後晉紀三案誥於

是年二月
更名昇

唐主將立齊王璟為太子固辭乃以為諸道兵馬大元帥判六軍諸衛守太尉錄尚書事昇揚二州牧上同

四年天福五年冬十月幸東都存省故老宴於舊宅踰月還

馬令先主書

乙巳詔幸東都命齊王璟監國庚戌帝自保德門御舟辛亥次迎鑾鎮甲寅至東都入建元門帝感念疇昔泫然流涕不已遣使問東畿士民不能自存者十一月乙丑宴羣臣於崇德宮故第也以廳事為光慶殿庚辰改東都文明殿為乾元殿英武殿為明光殿

應乾殿為垂拱殿朝陽殿為福昌殿積慶宮為崇道宮乙酉賜東畿高年疾苦俸獨米人二石十二月丙

申帝至自東都陸書列祖紀

六年天福七年三月遷讓皇子孫於海陵號永寧宮嚴兵守

之絕不通人久而男女自為匹偶吳人多哀憐之馬令先主書

案通鑑載此事在昇元三年

保大元年晉齊王天福八年二月庚午唐主殂秘不發喪下制

以齊王監國大赦三月巳卯朔唐元宗即位大赦改元

秘書郎韓熙載請俟踰年不從通鑑後晉紀四

秋七月以元子南昌王冀為江都尹東都留守馬令嗣主書二

八年

漢隱帝乾祐三年

二月以周宗為東都留守

馬令嗣主書三

十一年

周太祖廣順三年

冬十月築楚州白水塘以溉田

同上

先是楚州刺史田敬洙請修白水塘溉田以實邊馮

延巳以為便李德明因請大闢曠土為屯田修復所

在渠塘堙廢者吏因緣侵擾奪民田甚眾徐鉉以白

唐主唐主命鉉按視籍民田悉歸其主或譖鉉擅作

威福流舒州然白水塘竟不成

通鑑後周紀二

十三年

周世宗顯德二年

冬十月周宗乞罷鎮以馮延魯為東

都留守賈崇為東都屯營使

馬令嗣主書三

帝始議南征十一月乙未朔以宰臣李穀為淮南道前

軍行營都部署許州節度使王彥超為行營副部署命

侍衛馬軍都指揮使韓令坤等一十二將各帶征行之

號以從

舊五代史周世宗紀二

十四年

顯德三年

二月丙戌侍衛馬軍指揮韓令坤奏收下

揚州辛卯令坤上言泰州降

舊五代史周世宗紀三

韓令坤磁州武安人周世宗即位為馬軍都指揮使

領定武軍節度世宗征淮南揚州無備令坤先令精

騎數百遲明馳入城中不之覺令坤繼至撫之民皆

安堵遂以令坤知州事由是泰州懼以城降世宗復

幸淮右遣令坤先入揚州權知軍府事

宋史令坤本傳

東都屯營使賈崇焚官府民舍棄城南走副留守馮延魯髡髮被僧服匿於佛寺軍士執之泰州刺史方訥奔

金陵通鑑後周紀三

王師下廣陵江左驚窘李景偽署晟為司空令奉貢於

行在舊五代史孫晟傳案

世宗征淮南下詔撫安楊氏子孫李景聞之遣人盡殺

其族楊氏遂絕五代史吳世家

吳讓皇既殂於丹陽其族屬尚居泰州廨舍先主自受禪以還未暇措置迨殂方囑嗣君曰邦君皆楊氏所有偶移在我吾憫孤兒嫠女僑寄殊鄉令往泰州

津斂楊族安於京口賜贍撫育無令失所男女昏嫁悉資官給環稟遺戒遣園苑使尹延範具舟車調費往泰般護時王室在難道路已亂延範慮有他變取子弟六十人皆殺之惟載婦女渡江環大怒以延範腰斬仍誅其族於市以慰其冤諸女二十餘人選士

族嫁之文瑩玉壺清話

馬希崇及王延政之子皆在揚州詔撫存之通鑑後周紀四

四月唐右衛將軍陸孟俊自常州將兵萬餘人趣泰州周兵遁去孟俊復取之遣陳德誠戍泰州孟俊進攻揚州屯於蜀岡韓令坤棄揚州走帝遣張永德將兵救之

令坤復入揚州敗唐兵於城東擒孟俊同上

初兩浙錢俶承詔遣兵攻常州為陸孟俊所敗李景

乘常州之捷遣孟俊領兵迫泰州王師不守韓令坤

欲棄揚州而回帝怒遣殿前都指揮使張承德往援

之俄而孟俊自海陵抵揚州令坤迎擊敗之生擒孟

俊舊五代史周世宗紀三初孟俊之廢馬希萼立希崇也滅

故舒州刺史楊昭暉之族而取其財楊氏有女美獻

於希崇令坤入揚州希崇以楊氏遺令坤令坤嬖之

既獲孟俊將械送帝所楊氏在簾下忽撫膺慟哭令

坤驚問之對曰孟俊昔在潭州殺妾家二百口今見

之請復其冤令坤乃殺之通鑑後周紀四

已卯韓令坤奏敗楚州將馬在貴萬餘眾於灣頭堰同上

秋七月揚州復入於唐五代史周世宗紀

元帥景達等趨壽州其將克復舒蘄秦三州夏大雨

周師在揚滁和者皆卻天子駐於渦口猶欲再幸揚

州宰相范質以師老泣諫乃班師以向訓守揚州訓

請棄揚州併力攻壽春乃封府庫付主者而去馬令

書

十五年顯德四年夏四月周帝北還冬十一月周帝復親征

陸書元宗紀

夏揚州府志

卷之二十一 事略二

四

十二月取泰州

五代史周世宗紀

帝遣鐵騎左廂都指揮使武守琦將騎數百趣揚州至高郵唐人悉焚揚州官府民居驅其人南度江後數日周兵至城中餘癘病十餘人而已癸酉守琦以

聞帝聞泰州無備遣兵襲之丁丑拔泰州

通鑑後周紀四

泰州潰周師步騎數萬水陸齊進軍士作檀來之歌

聲聞數十里

馬令嗣主書四

交泰元年

顯德五年

春正月改元中興三月大赦改元交泰

周帝次揚州遂至迎鑾鎮耀兵江口

陸書元宗紀

二月車駕發楚州丁卯駐蹕於廣陵詔發揚州部內

丁夫萬餘人城揚州帝以揚州焚盪之後居民南渡

遂於故城內就東南別築新壘戊辰遣使祭故淮南

節度使楊行密故昇府節度使徐溫等墓癸酉幸揚

子渡觀大江三月壬午朔幸泰州丁亥復幸廣陵辛

卯幸迎鑾江口遣右武衛大將軍李繼勳率舟師至

江島以觀寇癸巳帝臨江望見賊船數十艘命今上

帥戰棹追之賊軍退去今上直抵南岸焚其營柵而

回壬寅復幸揚州

舊五代史周世宗紀五案今上謂宋太祖

帝懼周師南渡遣樞密使陳覺奉表貢方物請傳位太

子宏冀以國為附庸

陸書元宗紀

詔故淮南節度使楊行密故昇府節度使徐溫各給守塚戶應江南臣僚有先代墳墓在江北者委所在長吏

差人檢校舊五代史周世宗紀五

四月宴從臣及江南進奉使馮延巳等於行宮徐遼代

李景捧壽觴以獻乙卯車駕發揚州還京同上案自此揚州入於

後周

重修揚州府志卷之六十六

